

NGA MAHI

A TE

HUI O TE HAHI MAORI

O TE TAKIWA O

TURANGA

I TE PIHOPATANGA O WAIAPU.

I HUIHUI KI WAIPIRO, NOWEMA 28, 29, 1876.


GISBORNE:

POVERTY BAY PRINTING AND PUBLISHING COMPANY.

1877.

HE TUHITUHINGA

I NGA MAHI A TE HUI O TE HAHU MAORI O TE TAKIWA O
TURANGA I TE PIHOPATANGA O WAIAPU I WHAKAMINEA KI
WAIPIRO I TE 28 O NGA RA O NOWEMA I TE TAU 1876.



No te awatea ka takoto te Hapa a te Ariki i roto i te Whare-
karakia, a, i te 5 o nga haora ka huihui nga tangata ki roto ki te
Whare-karakia, ka karangarangatia hoki nga ingoa e Te Wiremu,
Atirikona, me te whakao ano enei ki o ratou ingoa :—

MINITA : Raniera Kawhia, Matiaha Pahewa, Wiremu Ka-
tene Paraire, Rihara Te Rangamaro.

MANGAI REIMANA : Rutene Haokai, Hoani Ngatai, Rihara
Paipa, Te Hutana Taru, Te Wiremu Tamawhaikai, Hone Mei-
hana Tamararo.

Muri iho, ka ki te Upoko, kua tu te Hui, ka timataia te
mahi ki te Inoi, ka whai-korero hoki ia ki te Hui.

I whakaaria e Raniera Kawhia, Minita, i tautokona e
Rutene Haokai ;

Ka nui te aroha o tenei Hui ki a Te Wiremu Pihopa, kua
kaumatua nei, kua pangia hoki e te mate, i mutu ai tana mahi
Pihopa ki tenei wahi, kei te whakawhetai hoki ki te Atua, nana
nei ia i homai ki tenei wahi mahi ai ki roto ki nga tangata Maori
i nga tau e 50 kua pahemo ake nei. Ma te Atua ia e tiaki i nga
ra o tona koroheketanga, e whakarite hoki tetahi tangata whai-
whakaaro hei whakakapi mona ki te whakahaere i nga mahi o
tenei Pihopatanga.

Whakaetia ana.

I whakaaria e Matiaha Pahewa, Minita, i tautokona e
Rutene Haokai ;

Ka nui te aroha o tenei Hui ki a Hare Tawha, Minita, kua
ngaro nei i roto i nga mahi a te Hui, kua karangatia nei e te
Atua ki te okiokinga mona. Kei te noho mahara hoki tenei,
me te whakawhetai ano, ki te whakaaro pai, ki te kaha i whaka-
whiwhia mai e Ia ki tana pononga, i uaua ai ki te mahi i whaka-
ritea mai hei mahinga mana.

Whakaetia ana.

I whakaaria e Te Hutana Taru, i tautokona e Hoani Ngatai ;

Kia puta te whakaaro a nga tangata o tenei Takiwa ki te kohikohi i tetahi Tahua hei oranga mo te Pihopa o tenei Pihopatanga, kia uru ai ki roto ki te mahi kohikohi i karangatia nei e te Hinota o te Pihopatanga i mua ake nei. Ki te kitea he moni mo taua kohikohi, e pai ana ; ki te kitea he pihi whenua, e pai ana ano.

Whakaaetia ana.

Katahi ka nukuhia te Hui ki te 29 o nga ra o Nowema.

NOWEMA 29, 1876.

I te haora 11.30 ka huihui ano ki te Whare-karakia.

Timatia ana te mahi ki te Inoi ; muri iho, ka panuitia, ka whakapumautia nga tuhituhi o nga mahi onanahi.

I whakaaria o W. K. Paraire, Minita, i tautokona e Te Hutana Taru ;

Me whakaputa tenei kupu ki te Hinota Nui e nga tangata o tenei Pihopatanga e tae atu ana ki reira, ara, Kia whakata-
kotoria tetahi tikanga marama e uru ai nga Reimana o te Hahi Maori ki roto ki te whiriwhiringa i te Pihopa ina whakaturia he Pihopa hou mo to ratou wahi.

Whakaaetia ana.

I whakaaria e W. K. Paraire, Minita (na Hoani Ngatai te kupu) i tautokona e Rutene Haokai ;

He kupu akiaki tenei ki nga matua o nga tamariki katoa o tenei Takiwa, ki nga tangata whakaaro hoki, kia puta ano to ratou uaua ki te whakaako i nga tamariki ki te korero i te Karaipiture, ki te Katikihama, ki era atu mea hoki e whai pai ai te wairua o te tangata.

Whakaaetia ana.

I whakaaria e Te Hutana Taru, i tautokona e Rihara Paipa ;
Kia kaha ano te tautoko a nga tangata katoa i nga Kura kua tu nei i te Kawanatanga ; kia tukua katoatia nga tamariki ki aua Kura ; kia puta ano hoki te uaua o nga tangata ki te mahi i te kai ma nga tamariki o te Kuwa.

Whakaaetia ana.

I whakaaria e Te Wiremu Tamawhaikai, i tautokona e Rutene Haokai ;

He whakamahara tenei i nga tangata o tenei Takiwa ki te kupu a te Hui i whakapuakina i te tau 1874 mo te kohikohi ano i tetahi Tahua hei whakaranea mo nga Tahua Oranga Minita.

Whakaeti ana.

I whakaaria e Raniera Kawhia, Minita, i tautokona e Te Hutana Taru ;

He whakapai tenei ki te taenga mai o Te Tuata, Minita, ki roto ki tenei whakaminenga o te Hui, ki tona haerenga mai ki Niu Tireni nei i runga i te karanga aroha a etahi o nga tangata o te Hahi i Ingarani ki te whakaako i etahi tangata Maori hei Minita. Ma te Atua e whakamana tana mahi.

Whakaetia ana.

I whakaaria e Rihara Te Rangamaro, Minita, i tautokona e Rutene Haokai ;

Kei wareware te iwi ki te ki a te Hui i whakapuakina i te tau ka pahure ake nei mo te haurangi waipiro, ara, mo te tohe tonu ki nga tangata kai-waipiro kia mutu te kai i tena mea nanakia.

Whakaetia ana.

I whakaaria e Rihara Te Rangamaro, Minita, i tautokona e Rutene Haokai.

Hei Te Horo he whakaminenga mo te Hui i tenei tau e haere ake nei.

Whakaetia ana.

Kei konei ka whakamutua te mahi a te Hui ki te Inoi.

